

# Ils nov onns grass èn passads

Cusseglia governativa Barbara Janom Steiner ha preschentà il quint statal 2013

CUN CUSS. GUV. BARBARA JANOM  
HA DISCURRÌ MARTIN CABALZAR

■ **Suenter nov onns cun avanzaments serra il rendaint statal per 2013 per l'emprima giada puspè cun in resultat negativ. Davart ils motivs per questa vieuta ha La Quotidiana discurrì cun la ministra da finanzas Barbara Janom.**

*Il chantun ha gì 9 onns grass. Èsi uss da far quint cun 9 onns maghers?*

Barbara Janom: Jau na speresch betg. Il resultat dal quint 2013 sto vegnir giuditgà a moda differenziada. Il resultat operativ serra anc adina cun in retgav da stgars 40 milliuns. Tras las midadas dal model da rendaint avain nus stuì far correcturas da valor che han alura midà il resultat positiv en in resultat negativ cun in deficit da 34 milliuns. Plinavant èn las aczias da Repower stadas quest onn massiv sut squitsch uschia ch'il resulta n'è facticamain betg dramatic.

*Uss ha il chantun cumprà l'onni passà in pulit grond pachet d'aczias da Repower dad Alpiq. È questa cumprà pia stada disgraziada?*

Na, quai na pon ins tuttavia betg pretender sin fundament dal rendaint statal da quest onn. Nus avain definà nossa politica d'energia ed accentuà che la forza idraulica haja potenzial en il Grischun e quai er en il futur. Ord questa optica n'è noss engaschament tar la Repower betg mess en dumonda pervi da la reduziun da la valita da las aczias da Repower en l'onni passà. Era na pon ins betg dar la culpa a la Repower per il quint ne-



Barbara Janom Steiner: «Il plan da finanzas 2015–2018 quinta cun deficits da 73 fin 95 milliuns.» FOTO O. ITEM

gativ dal chantun. La valita da las aczias da Repower dependa fitg ferm da la politica d'energia en l'Uniuin europeica. Cuzunt las autas subvenziuns da la fotovoltaica en Germania mettan sut squitsch nossa energia idraulica.

*Cun tge sfidas finanzialas sto il chantun quintar ils onns proxims?*

I dat tuttavia pliras sfidas. In da las sfidas principalas è la gulivaziun da finanzas tranter confederaziun e chantuns. Qua datti probabel tsherts midaments. Nus sperain che la proposta dal cussegl federal vegnia acceptada cun excepziun da la reduziun previda

da las resuras. Sch'ina fa qua memia blier concessiuns als chantuns che contribueschan avess quai in effect negativ sin il Grischun. Plinavant èn pendentas pliras iniziativas che pudessan avair in effect negativ sco la taglia pauschala, l'iniziativa davarr las abitaziuns secundaras e l'iniziativa da famiglias. Igl èn cuzunt svilups sin plaun nazional che han in effect concret sin las finanzas dals chantuns.

*Ina gronda part da las entradas dal chantun vegn da Berna. Quintan ins che quellas creschian u sminueschian ils proxims onns?*

Quai dependa dals resultats da las

tractativas davart la gulivaziun da finanzas. Damai ch'ils chantuns urbans e las aglomeraziunhan era da sbatter cun gronds problems finanzials vegn il squitsch da scumpartiziun tendenzialmain adina pli grond e pli dir a disfavur dals chantuns da muntogna.

*Sco Vos menziunais n'èn las perspectives finanzialas betg exnum bunas per ils proxims onns. Ston ins ev. quintar cun in nov pachet da spargn u cun in augment dal pe d'impostas?*

Ins na dastga betg survalitar il resultat negativ dal quint 2013 che è per gronda part d'attribuir a la midada da sistem. Nus avain dentant vinavant ina

buna basa d'agen chapital cun 2,7 milliardas e praticamain nangins daivets. Perquai n'è ni in pachet da spargn ni in agument da las taglias uss in tema.

*La situaziun finanziaria vegn betg meglra, anzi mendra. E tuttina èn la ministra da finanzas ed er la regenza prontas da far in regal al personal?*

In na constat betg ch'i sa tracta d'in regal al personal. Las vacanzas augmentadas è ina singula mesira da quest pachet che è blier pli vast e che è gnanc vegnì discutà en detagl en la cumissiun.

*In grond benefizi per il chantun èn er ils retgavs che vegnan da la Banca nazionala e da la Banca chantunala. Restan quels vinavant stabils?*

Nossa Banca chantunala è sa posiziunada fitg bain ed il chantun vegn a profitar vinavant da quai. Tar la Banca nazionala dependi grondamain dal svilup sin il sector bancar internaziunal, uschia che prognosas èn difficilas.

*L'onni passà ha il chantun investà 48 milliuns pli pauc che budgetà. Daco quai?*

Quai constat. L'onni passà ha il chantun investà 161 milliuns en cumparegliaziun cun 175 milliuns l'onni precedent e dals 223 milliuns budgetads. Dad ina vart ha quai da far cun la midada da sistem che pretenda novas cunfinaziuns da las investiziuns. Da l'autra vart avain nus stuì constatar che tsherts projects n'han betg pudì vegnir realisads (guntgida Silvaplana) pervi da recurs pendents. La regenza è ferm intenziunada da tegnar aut las investiziuns.